

05 SEP 1998

ANWAR: SAYA SETUJU DENGAN DR MAHATHIR MENGENAI SISTEM KEWANGAN DUNIA

KUALA LUMPUR, 5 Sept (Bernama) -- Bekas Timbalan Perdana Menteri Datuk Seri Anwar Ibrahim hari ini berkata beliau bersependapat dengan Perdana Menteri Datuk Seri Dr Mahathir Mohamad tentang kelemahan sistem kewangan dunia.

"Saya setuju dengan beliau berhubung beberapa kelemahan dalam sistem kewangan antarabangsa dan dalam perkara ini beliau adalah betul," katanya kepada pemberita di kediamannya di Bukit Damansara di sini.

Bekas Menteri Kewangan itu ditanya sama ada usaha kerajaan mengadakan langkah-langkah mengawal tukaran wang asing dan pengaliran modal untuk membanteras spekulasi matawang bagi memulihkan ekonomi negara akan berhasil.

Anwar yang dilucutkan jawatannya sebagai Timbalan Perdana Menteri dan Menteri Kewangan Rabu lalu berkata: "Biar saya katakan begini, saya bukan tidak setuju dengan beliau mengenai isu-isu itu dan sebagai seorang rakyat Malaysia dan bekas anggota Kabinet, saya amat berharap eksperimen yang diumumkan pada 1 Sept itu akan berhasil demi kepentingan ekonomi negara dan rakyat kita".

Beliau juga berkata perkara itu bukan penyelesaian muktamad kepada masalah yang dihadapi negara.

-- BERNAMA

nh oba